

SAN PABLO KARTA EFXESO ÇXHABTEWE'SX JÏI

Efxeso çxhabtewe'sxtxi fxi'jni

¹ Adxa' Jesukristo jxkaahnisa Pablo yaaseth, txã'wête selpiwa'jsa Dxus nvxiitnisa. Txãa pa'ga Dxus luuçx Efxeso çxhabtewe'sx jÏi naa karta's fxi'jçxa kajaçthu, Kristo Jesusa's nwêese'jna fxi'zesawe'sxtxi weçxana. ² I'kwe'sxtxi' Dxusa' pu'çxhina vxite' kwe'sxtxi jxpe'jsa Jesukristowa, txãa pa'ga Dxus yakhçxáa mfxi'zewe.

Kristo jÏi yuupa'ga Dxus iiméh wala pu'çxni

³ Kwe'sxtxi jxpe'jsa Jesukristo Tata's wala yuh weçxawa'j ji'ptha'w. Kwe'sxa' Kristo yakh utxaapa'ga kîh yuhwa peejxmée jxukak txajx dxi'pte jxpubamée fxi'zewa'ja's nvxiht cielutewe'sx yuuwa'ja's. ⁴ Txãasa íik naa kiwe meetey Dxusa' kwe'sxtxi' txhitxh, kîh pkal yuhwa ji'phmée Kristo na'wêysa yuukahn. ⁵ Kwe'sxa' kîhte yuhwa seelpimeesatewa Dxusa' naasáa peeygãhçxa yuuçxáak Jesukristo nwe'wete', kwe'sx txajx luuçx yuuwa'ja's dxiikhëy vxitçxa nvxiht. ⁶ Txã'wê peeygãapa'ga Dxusa's bagaçxtewa weçxana yuuçxáa tuuthe'jwa'j ji'ptha'w, txajx Nçxi'k Jesukristo nwe'wepa'ga. ⁷ Txãa Jesukristok kwe'sxtxi' nwe'we txajx eeju kwe'sx pkaltxi jxuka peltunãyçxa. Nawa Dxusa' kwe'sxtxi wala peeygãhçxa yuuçxáak txã'wê yuuwa'ja's vxit. ⁸ Txã'wêy Dxusa' kwe'sxtxi'

kĩhte yuhwa peejxmée jxuka ãate kaajiyu'kh.
 9 Nyafxiitey kim yuhwa jiyunimeete ma'wě
 yuuwa'ja's ne' vxitçxa ji'phu' txã'snak kwe'sxtxi
 kaajiyu'j. 10 Txãa yu' na'wěk yu': cielute
 ũssa vxite' naa kiwetewe'sx yã'jçxa jxuka
 Kristoçxaçxá's nwěese'jwa'ja', aça' txã'wě
 yūuwa'j en ãhte', jxuka kxtey yuuna.

11 Dxus jīi yu'sa' jxuka jxpa'gawa'ja's
 Dxusa' nyafxiitey ne' pheu'jçxa nvxiht
 Kristo nwe'wenisawe'sx jīi. Naa pa'ga
 Kristo nwe'wenisa' jxpa'gawa'jsatha'w Dxus
 pheu'jçxa nvxiitni yu' jxuka. 12 Kwe'sx txã'wě
 yūuwa'ja'sku Dxusa' pheu'jçxa nvxiht, Kristo's
 nyafxte neewe'wesa kwe'sx txã'wě Dxus ew
 yūupa'ga weçxaakahn. 13 Aça' i'kwe'sxwa
 txã'wěy Dxus yuwe ewte nvxiitwa'jsa's wěse'jçxa
 Kristo yakh fxi'zeya' utxaaçpkaçxha', Dxus ũsni
 txajx Espiritu' i'kwe'sx ũuste khēek, Dxus kuseju
 peena yu' txutekahmen. 14 Aça' Dxus Espiritu's
 ũuste ji'phsa' nmeh ente' txajx nasatx jxukate
 nwe'wena jxã'jnijū' Dxus jīi yu'sa' kīhnawa
 jxuka jxpa'gawa'jsaçxa txã'wě txajx Espiritu's
 ji'phsa ya'yuuna. Txãa pa'ga Dxus txakwe wala
 ew yūusa's weçxawa'ja'.

*Dxus yakh jweeüçxáa ew fxi'zewa'ja's kaa-
 jiyu'khan pēyni*

15 Txãa pa'gath adxa' txã'wě i'kwe'sxa' Kristo
 Jesus yakh jxpubameetx fxi'ze', sa' Dxus luuçx
 jxukaysawe'sxtxi peeygãja'tx jīni's jiyuçxa',
 16 bagaçxtewa Dxus yakh puutx we'wena
 weçxana nes yu'. 17 Sa' kwe'sxtxi nwe'wesa
 Jesukristo Tata cielutewe'sxa's pēyi'th, txãa

yakh jweeíçxáa ew fxi'zewa'ja's kaajiyu'khan, ¹⁸ kxah i'kwe'sxtxi kǐjxa' nwe'weçxawa ew kaajiyu'juna. Sa' cielute Dxus jǐ's kǐhnawa jxuka jxpa'gawa'j ji'ptha'w txā' seena' yuh wala zhiçxkwesa' txā'snawa jiyune'kwe. ¹⁹ Sa' Dxus ājanisa kwe'sx ũustxi yu'pthehsa' seena' yuh walasa' txā'snawa jiyune'kwe. ²⁰ Dxusa' txāa ājanisa yakh íçxáak Kristo's uunijūwa ki' ĩtxi vxitçxa cielute txajx pukate kaykaçxi'j. ²¹ Sa' Kristo's cielute txajx pukate kaykaçxi'jçxak naa kiwete vxite' cielute maa maatewa jxthaakwe walasa vxitçxa jxkaahwa'ja's ũs, naa ente ma'k yuu meeçxa' vxite ente ma'k yuu nawa maatewa Kristoçxaçxáa jxthaakwe walasa yuukahn. ²² Dxusa' txā'wē yūuçxak kǐjkǐhwa Kristoçxaçxá's nwēese'jwa'ja's vxitçxa txajx luuçx yuutxi's Kristo yakh ih fxi'zewa'jsa vxit, txāawe'sx yuuçxáa maatewa puutejka wedxnisa txajx jxpe'jni yuukahn. ²³ Txāa pa'ga Kristo jxpe'jnisa' txāa yakh teeçxçxáa yuuna pa'jçxa, txāa na'wēysa íçxáata', kǐh yuhwa jwee yu' peejxmeesa.

2

Dxus peeygāpa'ga yuuçxáa nwe'wenisa

¹ Dxusa' Kristo'swa ma'wēga ĩtxi vxit, txā'wēyku i'kwe'sxtxiwa ĩtxi vxit. Txā'wēme', nyafxiia' i'kwe'sxa' pkalpa'ga Dxus dxi'pte uuní na'wē yā'ji'kwe ũs yu'. ² Txāasai'kwe txagaçxtey yu' eçxthē'j naa kiwete jxkaahni yuuçxá's nwēese'jna ũsu'. Dxusa's nwēese'jya' wa'lsa yuutxi's eçxthē'ja' jweeíçxáak kwa'lu'ju', aça'

txã'snai'kwe nwēese'jsa yu'. ³ I'kwe'sxçxáamée, kwe'sxwa nyafxiaa' txã'wēçxaçxáatha'w fxi'zesa yu' jxukaysa, ewmée yaakxniçxá's jxuka kxtey yuuna. Txãa pa'ga Dxus kastigo seena'sa's jxpa'gawa'jsatha'w yu' maawa jxukaysa.

⁴ Nawa txã'wē pkalpa'ga Dxus dxi'pte uuní na'wē yã'j ũstewa, Dxusa' kwe'sxtxi iiméh wala ew yūuk peeygãhçxa. ⁵ Txãasak Kristo'swa ma'wēga uunijūwa ïtxi vxit, txã'wēy kwe'sxtxiwa ïtxi vxit. Kĩhte yuhwa seelpimeesaçxawa, Dxus peeygãapa'ga yuuçxáai'kwe nwe'wenisa yuu. ⁶ Dxusa' Kristo'swa ma'wēga uunijūwa ïtxi vxit, txã'wēy kwe'sxtxiwa ïtxi vxitçxak cielute Kristo yakh kaykaçxi'j. ⁷ Nawa kwe'sxtxi txajx peeygãani txakwe seena' walasa's naa e'su' áate kaavxya'ja'jya'k txã'wē yūu kwe'sx txakwe wala áhmeekwetewa, naasáa Kristo pa'ga yuuçxáa. ⁸ Txãa pa'ga i'kwe'sxa' kĩhte yuhwa seelpimeesaçxawa, naasáa Dxus peeygãhçxa nwe'wenisaçxáa i'kwe, txã'wē Kristo's ũsuh jxuka yaakxpa'ga. Dxus nwe'weni's i'kwe'sx kakweju ew yūuna fxi'zeçxa uymeei'kwe, txã'sa' Dxusku pees peeygãhçxa. ⁹ Dxus nwe'weni's kakweju ew yūuna fxi'zeçxa ya'jypa'ga'çme' naa pa'ga maa yuhwa iiwejçx yaakxwa'j ji'phmeeta'. ¹⁰ Txãa pa'gatey kwe'sx u'se yu'pthehwa'ja's Dxus pheu'jçxa nvxiitnisatha'w, ewçxáa yūuna Kristo Jesus jxpe'jni fxi'zewa'jsa. Txã'wē yūuna fxi'zewa'ja's Dxusa' nyafxiiiteyku pheu'jçxa nvxiht, txã'wē yuuçxáa yūuna fxi'zekahn.

Dxus tasxte pa'jwa'ja's ji'phuni

11 I'kwe'sxa' nyafxiaa' ma'wēsakwe yu' txā'sna miijajkxwe: i'kwe'sxa' judiu ji'jmeei'kwe yu', aça' judiuwe'sxa' i'kwe'sxtxi's Dxus txhitxn-imeesata' jīnatx we'we'. 12 Sa' txāa ensu' judiuwe'sx yakhmée fxi'zesa i'kwe yu', Kristo's ūuste ji'phmeesa. Sa' i'kwe'sxa' Dxus pu'çxwa'ja'swa ji'phmeesa i'kwe yu'. Txāa pa'ga i'kwe bagaçxte yuhwa Dxus tasxte pa'jwa'j yu'sa' ji'phmeesa yu'. 13 Makwe nyafxii yu' Dxus tasxte pa'jwa'ja's ji'phmeesaçxawa, açxha' Kristo Jesusa's nwēese'jya' utxaapa'ga, Dxus tasxte pa'jwa'ja's uyi'kwe, Kristo' i'kwe'sxtxi nwe'weya' kluuste uupa'ga. 14 Kristo' txā'wē yūuçxak judiuwe'sx judiu ji'jmeesatx ahçena fxi'zeni's ivxiituçxa e'zsatx teeçx jwedçxāa vxitna pa'j. 15 Sa' Moises leya'swa kaapçu'ju'k, Kristo' tasxteçxaçxāa utxaaçxa e'zsa puutx yahçemée kxteeçxah ih fxi'zekahn. 16 Kristo' kluuste uuçxak e'zsatx kxteeçxah ih fxi'zewa'ja's vxitçxa, Dxus yakh yuuwemeesa vxit.

17 Kristo' kīhçxa' e'zīi Dxus yakh yuuwemée neeyūuwa'ja's pta'sxku, i'kwe'sx Dxus tasxte pa'jwa'ja's ji'phmeesatxwa pta'sxku, sa' judiuwe'sx Dxus tasxte fxi'zesatxwa pta'sxku. 18 Txāa pa'ga açxha' judiumtha'w yuu meeçxa' judiumeemtha'w yuu nawa Dxus Espiritu's jxpa'gaçxa e'zīi Dxus tasxte pa'jwa'ja's ji'ptha'w. 19 Açxha' i'kwe'sxa' nasa ekajuwe'sx meei'kwe, Dxus luuçx yakh kxteeçxah utxaaçxa teeçx yattewe'sxçxāa i'kwe yuuna pa'j jxukaysa txāa na'wēsaçxaçxāa. 20 Txā'wē kxteeçxah utxaapa'ga ew jiyute yu' i'kwe'sxa' yat

na'wěsa i'kwe: yata's nyafxte' kwet yakhku ya'kaaçxida'ja', aça' txãa kaaçxida'jnisa yu' Jesukristo'. Txã'wě yuuna mjïiya' takhsa' Dxusna selpisaawe'sx vxite' Jesus jxkaahnisawe'sxtxi yu'.
²¹ Aça' i'kwe'sxa' txãawe'sx kaaçxida'jna takhni kajkwete yata's ew pheu'jna umna u'jnisai'kwe, teeçx yatçxáa yuuna kãhçxa Dxus yuuçxá's selpiwa'jsa. ²² Txãa pa'ga i'kwe'sxa' Jesukristo yakh utxaaçxa', Dxus txhitxhnisa maa yakhwa kxteeçxah utxasáa i'kwe yuu, teeçx yatçxáa yuuna, txãa yatte Dxus ũswa'j yuuya'.

3

Dxus yuwe's judiu ji'jmeetx pta'sxwa'jsa

¹ Txã'wě adxa' Jesukristo kaapiya'jni's pta'sxpa'ga i'kwe'sx judiu ji'jmeeçxawa Dxus yakh fxi'zewa'ja's ji'phupa'ga, preesu ũşçxawa, Dxus yakh puutx we'we'th. ² I'kwe'sxa' jiiyã'jne'kwe Dxusa' i'kwe'sxtxi peeygãhçxa adxnak neewe'we i'kwe'sxtxi kaapiya'khan. ³ Sa' i'kwe'sxa' judiuwe'sx yakh utxaaawa'ja's kim yuhwa jiimeene'ta yu' txã'snak Dxusa' adxa's kaajiyu'j. Aça' txã'sa' i'kwe'sxtxi nyafxii pta'sxna fxi'th walameekuẽ. ⁴ Txã'sa' lëeyçxa' jiyune'kwe kwe'sxa' judiuwe'sx yakh utxaaya' ajawa'ja'sne' Dxusa' Pablo's kaajiyu'j sũhna. ⁵ Txã'snak nyafxii enteya' kim yuhtxwa kaajiyu'jnimée ũsu', nawa açxha' Jesus jxkaahnisawe'sx vxite' Dxusna selpisaawe'sxtxi Dxusa' kaajiyu'kh txajx Espiritu kaaũsuthethe. ⁶ Txã' na'wě': Makwe judiu ji'jmeeçxawa Kristo nwe'weni's nwěese'pha'ga yuuçxáa e'zii kxteeçxah

utxaaçxa teeçxçxáa yuuna pa'jçxa, judiuwe'sx yakh ja'da Dxus tasxte ũswa'ja's ji'phutx, sa' Dxus ũsni Kristo ji's íçxáa jxuka jxpa'gawa'jsata'. Txã'wêk kaajiyu'j.

⁷ Txã'wê yũuni's pta'sxwa'jsak Dxusa' adxa's nvxiht, txakwe wala ãhmeekwesatewa txãafi adxa's pu'çxçxa. ⁸ Adxa' Dxus yakh fxi'zesa maatewa jxthaakwe ãhmeekwesath. Nawa Dxusa' adxa'sku nvxiht, Kristo nwe'wenisa yuuçxáa kîhtewa thaakwe ewsa' txã'sna judiu ji'jmée vxite nasatx pta'sxkahn. ⁹ Txã'wê kîhnawa jxuka pheu'jsa Dxusa' judiu ji'jmeetxwa nwe'weçxa judiuwe'sx yakh kxteeçxah yuutxaya' ãjawa'ja's txãniiteyku pheu'jçxa ji'phu' kim yuhtxwa kaajiyu'jnimée txã'sna ãate pta'sxwa'jsath nvxiitni yuu maatxwa jxukaysatx. ¹⁰ Dxusa' ma'wê yũuçxa nasa ma'wêsatxwa jxuka nwe'weçxa kxteeçxah teeçxçxáa vxitna pa'jni's kaajiyu'jnik yuu, aça' Dxus txã'wê yũuni's ãçxha' Dxus yakh fxi'zesawe'sxa', êe walatewe'sx, angeles ma'wêsawa jxuka jiyutxna. ¹¹ Dxusa' txã'wêne' nasatx nwe'wewa'ja's txãniitey pheu'jçxa ji'phu' naa kiwe meetey txã'sa' kxtey yuuk, Jesukristo's naa kiwete kaahçxa. ¹² Txã'wê Kristo nwe'wepa'ga ãçxha' Dxus tasxte ũukhmée pa'jya' ãjatha'w, txã'wê ũukhmée utxaawa'ja's Kristo íik kaaũusuthe'je' naa pa'ga. ¹³ Txãa pa'ga adx i'kwe'sx pa'gate pxthaa yuuni's nxusna yajkxmée, wejxwa Dxusa'sçxáa weçxana meswe.

Kristo peeygãani iiméh seena' walasa

14 Txã'wẽ Jesukristo Tata' nwe'wewa'ja's pheu'jçxa kxtey yuupa'gath adxa' txã'sa' peejxükweçxa weçxana neewe'we', 15 txã'sa' maawa jxukatx Tata jĩna kxsusu' Dxus luuçx naa kiwetewe'sx ma'tx yuu, cielutewe'sx ma'tx yuu nawa jxukaysa. 16 Aça' adxa' Tata's pëyi'th, Dxus Espiritu i'kwe'sxtxi pu'çxna kĩhte yuhwa peejxmée çxhãçxha kaafxi'ze'khan, 17 kxah i'kwe'sx ũusuh jxuka yajkxte', Kristo' i'kwe'sx ũuste nes yuuna. Txã'wẽ yũute', i'kwe'sxa' jxpubamée peeygãawa'jçxá's wala ji'phuçxa 18 Dxus luuçx jxukaysa jiyuya' ãjane'kwe, Kristo peeygãhçxa nwe'wenisa iiméh seena' walasa'swa. 19 Txãa peeygãani' iiméh seena' walasa' aça' ¿kimçxa' jiyuya' ãjama'tx? Txã'wëtewa i'kwe'sx jiyukahn Dxusa's pëyi'th, kxah Dxusa's ũusuh jxuka jiyuçxa txãa yakh yuuuçxáa fxi'zene'kwe.

20 Dxusa's seena' yuh wala weçxaawa'ja'. Txã' kĩhtewa jxuka pu'çxya' ãjawa'jsa', kwe'sx makwe pëjxtewa txãate jxthaakwe wala багаçxtewa pu'çxna nes yuuwa'jsa'. 21 Txãa pa'ga Kristo nwe'wenisa yã'j yu', Dxusa's багаçxtewa weçxana nes yuuwa'ja' Kristo nwe'wepa'ga.

4

Dxus Espiritu' ma'wësatxwa kxteeçxah yuutx-ani

1 Kristo's selpiipa'ga adxa' preesu ũsthu, nawa i'kwe'sxtxi neewe'we'th: ma'wë fxi'zekahn ne' Dxusa' i'kwe'sxtxi txhitxh txã'sa' kxtey yuuna meswe. 2 Dxus yakh fxi'zesayã'ja' maa yuhwa

iiwejçx yajkxmée wejxwa puutx ya'peeygãhna ewçxáa yũuna mfxi'zewe. ³ I'kwe'sxa' puutx ũusçxa yajkxna fxi'zemée, wejxwa kxteeçxah txutemée fxi'zewa'jçxá's mpa'pçxuwe, Dxus Espiritu' kxteeçxah yuutxa yã'kh naa pa'ga. ⁴ Txãasa Kristo nwe'wenisa yã'j yu', ma'wěsaçxawa kxteeçxah teeçxçxáak yuuna pa'ja', sa' kxazíi Dxus Espiritu' teeçxsaçxá'stxi jxukaysa jxpa'ga', sa' kxazíi teeçx ahte Dxus tasxteçxaçxáa pa'jwa'ja'sku ya'ũythasu', ⁵ txãa pa'gatey jxukaysatx nwe'wesa' teeçxçxá', aça' txã'sçxáanak jxukaysa ya'nwěese'je'. Sa' jxukaysa txã'sçxaçxáanak yajkxna bautismo's ya'jypa'ga'. ⁶ Sa' teeçx Dxusçxáa ũsa' jxukaysate Tata txã' maatewa puutejka walasa' jxukaysatx jxkaahsa, sa' jxukaysa yakh ũsa'.

⁷ Sa' teeçxçxáa vxitna pa'jçxawa, Dxusna selpiiya' ājawa'j yu'sa' fxiyfxiyçxajk Kristo' ũs teeçxsa na'wěçxah. ⁸ Txã'wě yũuwa'ja's we'weçxak Dxus librute na'jĩna fxi'jni yuu:

Ewmeesa kusejũ nwe'weçxa cielun pe'jna u'kh, Sa' naa kiwete nasatxi's ājawa'ja's ũsku jĩ'k.

⁹ ¿Ma'wěçxaga txã'wě cielute tejka jĩna we'wé'? Kristo' nyafxte' uusaawe'sx ũsnite khuē'y khēeçxa txãajũk ki' cielute tejka jĩçxak txã'jĩ'. ¹⁰ Txã'wě uusaawe'sx ũsnite khuē'y khēesa iŕçxáak cielute iiméh ēe walate kãhpkaçx tejka, mteewa txãaçxaçxáa jxuka thegna ũsya' ājaya'. ¹¹ Txã'wě yũuçxak Dxusna selpiiya' fxiyfxiyçxah ājawa'ja's ũs jxukaysatx teeçxsa na'wěçxah: maaítxi's txajx yuwe's nyafxte pta'sxwa'jsak nvxiht; vxitetxi's Dxus

ma'wē yūuya'watewa dxiikhēy pta'sxwa'jsak nvxiht; vxitetxi's Dvus yuwe pta'sxwa'jsak nvxiht; vxitetxi's Dvus yuwe's kaapiya'jna jxpe'jwa'jsak nvxiht. ¹² Txajx nasatxi' txā'wēk mjīiwa'jsa pheu'jçxa nvxiht, txā'wē Kristo nwe'wenisa yuutxi' jweeñçxáa kxteeçxah çxhãçxha fxi'zewa'ja's kaapiya'khanku txā'wē yūu. ¹³ Kxah jxukaysa Dvus Nçxi'ka'sçxaçxáa nwēese'jçxa txā'sa' ew jiyuna jxã'jçxa kñhte yuhwa jxpubamée ew fxi'zekahnku txā'wē kaapiya'jçxa nvxiht. ¹⁴ Txajū yūuçxa' luuçx na'wē yuume'nja'w. Txā'wēme' nasa ewmée yajkçxa ãsxiina pta'sxnite thēyméek wetena pa'jçxa kxte jxpubana ya'fxi'ze'. ¹⁵ Txā'wē jxpubamée, wejxwa isasaçxá's we'wena peeygāawa'j yuuçxá's yajkçxa Kristo yakh jweeñçxáa çxhãçxha fxi'zena u'jwa'j ji'ptha'w. ¹⁶ Aça' maawa Kristo tasxte utxaaçxa jxukaysa kxteeçxah pkhaakheçxa puutx ya'kaapiya'jna ew yūuna fxi'zete', thēyméek peeygāhna fxi'zewa'ja' walaana u'jwe'.

Ewmée yaakxni's jxuka yu'pthehni

¹⁷ Txā'wē' aça' kxaht i'kwe'sxtxi neewe'we', vxite nasa Dvusna jiimeesa na'wē fxi'zewe'sxte. Txāawe'sxa' peekx ũus yaakxni seelpiwa'jmeesaçxá'stxi kxtey yuuna fxi'ze'. ¹⁸ Txā'wē Dvusa's jxpa'gaya' wa'lpa'ga Dvus yakhmée ũsçxa ew eena' yaakxwa'j yu'sa' ji'phmeeta'. ¹⁹ Txāasatx txāawe'sxa' thaame ũus yu'sa' ji'phmée, pkal seena' kazxsateçxáa fxi'ze'. ²⁰ Nawa i'kwe'sxtxi' Kristo' txā'wē fxi'ze' kaahme'. ²¹ Txā'sa' i'kwe'sxa' peekx

jiine'kwe Jesus kaapiya'jni isasa's wēse'jsa dxihçxa', ²² nyafxii ũus yaakxni ewmeeteçxáa kaafxize'jsa's nwēese'jmée jxuka nvxihtçxa, ²³ ew ũus yaakxwa'ja's kaapiya'jni yakh mphu'se'jwe. ²⁴ Kxah i'kwe'sx ũuste ewsa yuuçxáa yu'pthehni yuute', Dxus ma'wēne' jxthāasu' txāa yuuçxáana āate kaavxya'ja'jna fxi'zene'kwe, Dxus dxi'pte kīh pkal yuhwa ji'phmée.

²⁵ Txāasa āçxha' peena yu' ĩsxiina fxi'zemée, wejxwa teeçxsa na'wēçxah isasaçxá's mwe'wewe maa yakhwa, txāa pa'gatey jxukaysa kxteeçxah teeçx jwedçxáa yuuna pa'jsatha'w txāa ji'jçxaçxáatewe'sx.

²⁶ Mpa'yajkxwe, ũusçxani yakhçxáa yu' fxi'zewa'jme', ewmeete weteya'mée. Txāa entey ya'mpeltunaīwe. ²⁷ Eçxthē'ja's weh yuhwa ka'ga'jnuwe.

²⁸ Pesweesawa Dxusna jiyunijūyā'ja', pesweewa'jme', wejxwa pesweemée kuseju mjiiçxa vxite peejiina fxi'zesatxwa pu'çxna fxi'zewa'ja'.

²⁹ Sa' kazx we'wenisa yu' teeçx yuweçxáa yuhwa i'kwe'sx yuweju kasehwa'jsame', wejxwa Dxus yakh fxi'zewa'j selpiwa'jsaçxá's we'wewa'ja', kxah vxitesawa Dxus yakh fxi'zewa'jçxá's piyaatxna. ³⁰ Sa' Dxus Espiritu'swa kxūusu'jnuwe, txāa pa'gatey Dxus Espiritu i'çxáak i'kwe'sxtxi's Dxus jii vxitna pa'jçxa nvxiht, Dxus tasxna u'jwa'j en āhtewe'sx.

³¹ Sa' ewmée yajkxna, ahçena, pxūuskwe yuute juuna' we'wena, ũusaçxana ma'wēwa

wëesxuna fxi'zenijũ jxuka mtxuteewe.
³² Wejxwa puutx ewçxáa yũuna, teeçxa
 na'wëçxah puutx peeygãhna, puutx
 ya'peltunãyna mfxi'zewe, Kristo kwe'sxtxi
 nwe'wete Dxuswa ma'wëga kwe'sxtxi peltunãy
 txã'wëy.

5

Dxus luuçxyã'ja' txãa na'wëy fxi'zeni

¹ I'kwe'sxa' Dxus luuçx yã'ji'kwe
 na' txãa na'wëy fxi'zeya' mpa'pçxuwe.

² Puutx ya'peeygãhna mfxi'zewe, txã'wë
 yũukahniíçxáak Kristowa kwe'sxtxi peeygãhçxa
 Dxus dxi'pte peekíi ya'dukhçxa piisxakuë na'wë
 ikhni yuu.

³ Txãa pa'ga i'kwe'sxa' Dxus jïiyã'jçxa', ptamsa
 ma'tx yuu meeçxa' ptamsamée ma'tx yuu
 nawa kazx yuuna fxi'zeni's jxuka nvxihtçxa
 ũusteçxáa yuhwa yaakxwa'j ji'phmeei'kwe.
 Sa' Dxus yu's yajkxmée ji'phu wëeniçxá's
 yaakxwa'j ji'phmeei'kwe. Kihwa kazxsa
 yu'sa' kxsuswa'jçxáa yuhwa ji'phmeei'kwe.

⁴ Thaampa' yũuni kïh yuhwa seelpimeesa
 yu'sa' txã'wë we'wena fxi'zewa'jme', wejxwa
 Dxusa'sçxáa weçxana fxi'zewa'ja'. ⁵ I'kwe'sxa'
 jii yã'ji'kwe: Dxus yu'sa' yajkxmée ji'phu
 wëeniçxá's yajkxna fxi'zesa (txã'wë ji'phu
 wëeniçxá's yajkxte', txã'sçxáanak dxus na'wë
 yaakxwa'j kaseje'), kazx pkal yũuna fxi'zesa,
 kihwa kazxsaçxá's kxtey yuuna fxi'zesa, txã'wë
 yũusa' Dxus Kristo yakh jxkaahna ũsnite
 u'kaya' ãjameetxna. ⁶ Txãa pa'ga txã'wë pkal

kazxsate fxi'zewa'ja's kaapiya'jni's mpa'yajkxwe. Txã'wẽme' txãa pa'gãĩçxáa Dxus kastigo seena'sa yuja' Dxus jxkaahni's nwẽese'jmée fxi'zesawe'sx jĩi. ⁷ Txãawe'sx yakh ja'da ewmée yũuna fxi'zenuwe.

⁸ Nyafxii' i'kwe'sxa' jxpubana ũsçxa', çxhi'dxte na'wẽi'kwe fxi'zesa yu'. Nawa ãçxha' Kristo's ũuste jxpa'ganijũ' eena'te ũsi'kwe. Txãa pa'ga peena yu' jxpubamée eena'teçxáa mfxi'zewe Kristo nwe'wenijũyã'ja'. ⁹ Eena'te fxi'zeççxa', puutx peeygãhna isasaçxá's we'wena fxi'zewa'ja', Dxus dxi'pte jxpubamée. ¹⁰ Naasáa Kristo jxthãasniçxá's kxtey yuuya' mpa'pçxuwe. ¹¹ Jxpubana çxhi'dxte ũssa yakh ja'da ewmée yũuna fxi'zenuwe, wejx yuuwa txã'wẽ yũusatxi' mkaapiya'jwe ewmée yũukahmen. ¹² Txã'wẽme', paaçte txãawe'sx ewmée yũuna fxi'zeni's ãate we'wewẽete thaame yuja'. ¹³ Nawa txãawe'sx ewmée kazx yũuna fxi'zeni's thaamemée ãate we'wewa'ja', kxah kĩh yuhwa paaçtemée jxuka ãateçxaçxáa kaavxya'ja'jni yuuna. ¹⁴ Txã'sna we'weçxak na'jĩ':

Jxpa'yakxmeeg fxi'ze', miiyajkx.

Sa' pkalte uuníi na'wẽ fxi'zenijũ mkaaseh,

Aça' Kristo' eena'te kaafx'i'ze'jena jĩ'k.

¹⁵ Txãa pa'ga wala jxpa'yajkx fxi'zewa'jçxá's dud mpa'pçxuwe, jiimeesa na'wẽ jxpa'yajkxmée yu' fxi'zenuwe. ¹⁶ Txã'wẽme' naa ensu' nxuswa'j ençxáa kasejeça', naa pa'ga en ewsatxi' ivxiitunuwe. ¹⁷ I'kwe'sxa' jxpa'yajkxmée yu' fxi'zemée, ewsa's jiyuwa'ja's mpa'pçxuwe, Kristo

jxthãasniçxá's ew jiyuya'. ¹⁸ Txãasa tũuna fxi'zenuwe. Txã'wẽme', tũunisa' vxituwa'the pe'jna u'jsa'. Aça' txã'wẽ yũumée wejxwa Dxus Espirituçxá's ũuste jxuka jxpa'gaçxa, ¹⁹ i'kwe'sx pwe'sx jxukaysa Dxusa'sçxáa ũusuh jxuka ya-jkxna weçxana memna meswe. ²⁰ Makwe wala thẽysa vxyaatewa, txãatxi's nxusmée багаçxtewa Dxusçxáana weçxana meswe, Jesukristo's pi'kçxa.

Jxukaysa puutx ya'nwẽese'jna fxi'zeni

²¹ Açxha' i'kwe'sx pwe'sx jxukaysa puutx ya'nwẽese'jna mfxi'zewe, Dxusa's yajkxna. ²² Nyuua' nmi'a's nwẽese'jwa'j ji'pha', Kristo' txã'wẽk jxkaaja' naa pa'ga. ²³ Txãa pa'gatey nmi' txã'wẽ nyuua's thegna jxpe'jwa'jsa', Kristowa ma'wẽga txajx nwe'wenisatxi's thegna jxpe'je' txã'wẽy. Aça' Kristo' i'neeçxáa thegna jxpe'jmée, vxitukahmen nwe'wesa'. ²⁴ Aça' Kristo nwe'wenisawa ma'wẽta Kristo's nwẽese'je', txã'wẽy nyuuwe'sxwa nwẽese'jwa'j ji'phta' txãawe'sx nmi'tx kĩhtewa jxuka.

²⁵ Açxha' nmi'a' nyuua's peeygãawa'j ji'pha', Kristowa ma'wẽga txajx nwe'wenisatx peeygãhçxa txãawe'sx pa'gate kluuste uu txã'wẽy. ²⁶ Kristo' txã'wẽk yuu txajx nwe'wenisa nasatx kĩh pkal yuhwa ji'phmée jxuka yaatena pa'jçxa, ²⁷ txajx tasxte iiméh zhiçxkwe pheu'jni txãa yuuçxá's selpiwa'jsa vxit-ya'k txã'wẽ yũ. ²⁸ Nmi'a' txã'wẽ peekx nyuua's peeygãawa'j ji'pha' peekx kakwe'swa ma'wẽga ya'peeygãja' txã'wẽy, txãa pa'gatey nyuua' peekx kakwe'íçxá' naa pa'ga. ²⁹ Kim yuhwa peekx

kakwe's açe'çme', wejxwa wala ew jxpa'yaki'k. Aça' Kristowa txã'wëyku txajx nasatxi' wala ew jxpa'yakxna jxpe'je'. ³⁰ Txãa pa'gatey txãa jïi yã'tha'w, txajx tasxte txuteeya'mée utxasáa. ³¹ Txã'wëyku ya'yu', ptamusawa peekx neywe'sxtxi nvxihtçxa nyuu yuuwa'jsa yakh ya'utxa'k txuteeya'mée, aça' e'zçxawa teeçxçxáak yuuna pa'ja'. ³² Ptamuuçxa fxi'zenisa' Kristo txajx nwe'wenisa kxteeçxah utxaaçxa teeçxçxáa yuuna pa'jwa'ja's kaajiyu'jnisa', aça' txã'wë teeçxçxáa yuuna pa'jwa'ja's kim yuhwa jiimeetx yu' txã'snath pta'sxi'. ³³ Aça' ptamsayã'ja', teeçxsa na'wëçxah peekx nyuutx peeygãhna fxi'zewa'ja', i'kwe'sx kakwetx ma'wëkwe peeygãja' txã'wëy. Aça' nyuua' peekx nmi'a's nwëese'jna fxi'zewa'ja'.

6

¹ Kristo's jiiyã'jsa' luuçxwe'sx i'kwe'sx neywe'sxtxi nwëese'jna mfxi'zewe, Kristo' txã'wëk jxkaaja' naa pa'ga. ² Txã'wë kxtey nwëese'jsatxi's Dxusa' wala txaçx kaafxi'ze'jya' neeyũuk txã'sa' Moises leyte na'jïna pta'sxna fxi'jçxa nvxiitni ũsa': Peekx neywe'sxtxi nwëese'jçxa', ³ wala ew fxi'zene'ga naa kiwete wala txaçx jï'k.

⁴ Neywe'sxwa i'kwe'sx luuçxtxi zhiçxkwe ewçxáa miipe'jwe, Kristo's jiyuwa'ja'sçxáa kaapiya'jna.

⁵ Selpisaawe'sxwa naa kiwete i'kwe'sx patronwe'sxtxi wa'lmée mwëese'jwe, Kristo yu's nwëese'je'ç na'wë yajkxna. ⁶ Patronwe'sx thegna ũsteçxáa txã'wë kxtey yuuwa'jme',

wejxwa Kristo's nwēese'je'ç na'wē yajxna kxtey yuuwaja', ũuste weçxana. ⁷ I'kwe'sx mjīia's wa'l yajxméé Kristo's selpiičthu sūhna ew mjīiwa'ja', nasatx selpiičthu sūhmée. ⁸ I'kwe'sxa' jiiyā'ji'kwe patron ji'phsa ma'k yuu patron ji'phmeesa ma'k yuu nawa txā'wē yūusatxi' Dxus dewewa'jsa' teeçxsa na'wēçxah ma'wē mjīisatewa. ⁹ Patronwe'sxwa i'kwe'sxtxi selpisaatx juuna' yūumée miipe'jwe, txāa pa'gatey jii i'kwe selpisaawe'sx vxite' patronwe'sxwa jxukaysa Kristo cielute ũssa teeçx yuuçxáana nwēese'jsai'kwe. Txāa pa'gatey Kristo dxi'pte' maa yuhwa thaakwe walasa meeta'.

Ewmeesa's deewewa'ja's jxpa'gani

¹⁰ Āçxha', yakhthē'jwe'sx, çxhāçxha mfxi'zewe Kristo yakh txutemée, aça' txā' pu'çxna nes yuuna bagaçxtewa kçxhāaçxha'jna. ¹¹ Txāa pa'gatey ewmeesa yakh puiiwa'ja's Dxusa' jxuka ũsku, aça' txāa yakh puiiçxa', eçxthē'j ewmée yūunite wetemeene'kwe. ¹² Txā'wēme', naa kiwete nasaa pwe'sx yakh puiina ũsmeetha'w. Naa kiwete eçxthē'j ma'wē seena' ewmée kazx txāaçxaçxáa jxkaahna ũsna txāa yakh kwe'sxa' pdxi'puçxa puiina ũstha'w. ¹³ Txāa pa'ga ewmeesa yakh puiiwa'j Dxus ũsni's jxuka mpa'gawe, ewmeesa yakh pdxi'puçxa ũukhmée çxhāçxha deeweya'. Txā'wē yūuçxa', ewmeesa ma'wēsa'swa i'kwe'sx yuh knayuune'kwe. ¹⁴ Txāasa āçxha' ũukhmée çxhāçxha meswe, Dxus yuwe isasaçxá's ũuste ew yu'akhçxa kxtey nwēese'jna. Ew yūuwa'j

yuuçxá's ũuste jxuka mji'phuwe. ¹⁵ Sa' Dxus yuwe ewte nvxiitwa'jsa's mteewa pta'sxya' u'jya'çxáa meswe. ¹⁶ Aça' Dxusa' kîhtewa jxuka pu'çxhina sũhwa'j yuuçxá'sa' weh yuhwa peçxkananuwe. Txã'wẽ yaakxni yakha' eçxthẽ'j makwe seena' yuuçtewa, jxuka knayuune'kwe.

¹⁷ Dxus nwe'wenijũyã'ja' txãajũ weh yuhwa txutenuwe, sa' Dxus Espiritu kaapiya'jni Dxus yuwe'swa weh yuhwa peçxkananuwe.

¹⁸ Txã'wẽçxáa yũumée, Dxus Espiritu's pi'kxçxa Dxus yakh yuuçxáa bagaçxtewa puutx we'wena meswe, çxhãçxha fxi'zewa'ja's pẽjxna. Sa' Dxus yakh puutx we'wewa'ja's bagaçxte yuhwa peçxkanamée meswe, Dxus luuçx jxukaysa pa'gatewa Dxusa's mneewe'wewe. ¹⁹ Sa' adx pa'gatewa Dxusa's neewe'wena meswe, kxah

Kristo's ma'wẽ ũuste jxpa'gawa'ja's kim yuhwa jiyunimeesa's sxiigmée pta'sxya' ãjakahn.

²⁰ Txã'sna pta'sxwa'jsa íiçxáak Dxusa' adxa's nvxiht, aça' txãa pa'ga íiçxáa ãçxha' preesu ũsthu. Aça' i'kwe'sxa' Dxusa's neewe'wena meswe, txajx yuwe's ũukhmée pta'sxkahn.

Yuwe weçxaa kaahni

²¹⁻²² Kwe'sx yakthẽ'j Tíkiko bagaçxtewa Dxus yakh txutemée pta'sx pu'çxsa txã'sa' kajaçthu, adx ma'wẽne'tka fxi'ze' txã'sa' jxuka pta'sxkahn. Aça' adx ma'wẽ fxi'zena kîhçxah yũuna ũstewa jiyuçxa', i'kwe'sx maafi' yu' nxusna ũsçxawa çxhãçxha yaakine'kwe.

²³ Dxus kwe'sx Tata vxite' kwe'sxtxi nwe'wesa Jesukristo txãawe'sxa' i'kwe'sxtxi pu'çxhitxna, kîhtewa ewçxáa puutx ya'peeygãhna Dxusa's

yuuçxáa yajkxna fxi'zekahn. ²⁴ Sa' maawa
kwe'stxi nwe'wesa Jesukristo's yaakxsa yuutxi's
Dxusa' pu'çxhina jxukaysatx.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

06da09f4-8d0f-5001-ae8c-0e6aa0131ffd